

Na osnovu člana 29. Zakona o lokalnoj samoupravi - prečišćeni tekst („Službene novine Kantona Sarajevo“, broj: 22/00), člana 24. Statuta Općine Hadžići („Službene novine Kantona Sarajevo“, broj 15/09) člana 11. Odluke o utvrđivanju priznanja i nagrada Općine Hadžići broj: 01- 05-5-8211/2010., Općinsko vijeće Hadžići na 21. sjednici održanoj dana 28.10.2010. godine, d o n o s i

## **P R A V I L N I K** **o kriterijima i mjerilima za dodjelu općinskih priznanja**

### Član 1.

Ovim Pravilnikom se utvrđuju način predlaganja, kriteriji i mjerila za dodjelu priznanja i nagrada Općine Hadžići (u daljem tekstu: priznanja) koja se dodjeljuju za izuzetan i značajan doprinos i rezultate postignute u svim oblastima privrednog i društvenog života.

### Član 2.

Priznanja se dodjeljuju kolektivima i pojedincima sa područja Općine Hadžići za postignute rezultate u svim oblastima privrednog i društvenog života.  
Izuzetno od odredbe iz prethodnog stava priznanja se mogu dodijeliti kolektivima i pojedincima koji nemaju prebivalište - boravište na području Općine Hadžići u skladu sa kriterijima i mjerilima koji se utvrđuju ovim Pravilnikom.

### Član 3.

Priznanja Općine Hadžići su:

Zlatni grb sa plakatom koji se dodjeljuje svake četvrte godine , i to u vidu jednog kolektivnog i jednog pojedinačnog priznanja.

Šestomartovska plakata koja se dodjeljuje svake godine , i to u vidu jednog kolektivnog i dva pojedinačna priznanja.

Zahvalnica, i to do tri pojedinačna priznanja.

Posebno počasno priznanje i to najviše jedno godišnje u vidu jednog kolektivnog ili jednog pojedinačnog.

### Član 4.

Priznanje Općine Hadžići se mogu dodijeliti kolektivima i pojedincima, grupama, organizacijama, institucijama, pravnim i fizičkim licima, udruženjima, domaćim i stranim ako je njihov doprinos vezan za prosperitet i razvoj Općine Hadžići a ispunjavaju uslov iz člana 2. stav 2.

### Član 5.

Komisija za odlikovanja i općinska priznanja je dužna svake godine, a najkasnije do 15. decembra da raspiše Javni poziv (konkurs) za predlaganje kandidata –kolektiva i pojedinaca za dodjelu općinskih priznanja u najmanje jednom printanom ili elektronskom mediju, oglasnoj ploči zgrade Općine Hadžići i na web stranici Općine Hadžići.

Javni poziv će sadržavati kriterije za dodjelu kao i rok i adresu za podnošenje prijedloga.

Rok za podnošenje prijava ne može biti kraći od 15 dana.

#### Član 6.

Prijedlog za dodjelu priznanja subjekti iz člana 8. Odluke podnose u pismenoj formi sa obrazloženjem i relevantnim dokazima o zaslugama za kandidata za koga se predlaže dodjeljivanje priznanja prema članu 5. Odluke o utvrđivanju priznanja i nagrada Općine Hadžići.

#### Član 7.

Komisija za odlikovanja i općinska priznanja je obavezna, poslije isteka roka za podnošenje prijava ili inicijativa, da u roku od 15 dana razmotri pristigle prijave i inicijative i utvrdi prijedlog koji podnosi Općinskom vijeću na razmatranje.

#### Član 8.

Kriteriji za dodjelu priznanja općine Hadžići su:

##### 1. Zlatni grb sa plaketom Općine Hadžići

a) Kolektivima koji su u proteklom periodu od četiri godine :

- postigli izuzetan uspjeh u radu,
- na zakonit način zaposlili veće broj novih radnika,
- postigli izuzetne rezultate u oblasti privrede, nauke, kulture, sporta,
- obrazovanja, socijalne zaštite i sigurnosti.
- čiji su uspjesi dostigli Bosansko-hercegovačke ili međunarodne standarde.

b) Pojedincima koji su u proteklom periodu od četiri godine postigli :

- svojim pojedinačnim radom i zalaganjem u oblasti bosansko-hercegovačkih i međunarodnih standarda postigli izuzetne rezultate i na takav način doprinijeli prosperitetu i boljem životu društvene zajednice.

##### 2. Šestomartovska plaketa Općine:

a.) Kolektivima koji su u prethodnoj godini:

- postigli odnosno ostvarili značajne rezultate u radu,
- na zakonit način zaposlili veći broj novih radnika u odnosu na prethodnu godinu,
- investirali u proizvodnju i proširili proizvodni kapacitet u odnosu na prethodnu godinu,
- postigli značajne rezultate u oblasti privrede, nauke, kulture, sporta, obrazovanja, socijalne zaštite i sigurnosti, razvoju komunalne infrastrukture, zaštite radnih i prirodne sredine, razvoju amaterizma i sličnih oblasti koje je imalo odraza na razvoj društvene zajednice,
- značajno doprinijeli u otklanjanju elementarnih i ekoloških nepogoda koje eventualno zadese društvenu zajednicu.

- b) Pojedincima koji su u prethodnoj godini:
- svojim radom i zalaganjem postigli značajne rezultate i na takav način doprinijeli unapređenju rada kolektiva i društvene zajednice,
  - svojim radom u oblasti privrede, nauke, kulture i obrazovanja doprinijeli afirmaciji Općine Hadžići,
  - svojim radom i zalaganjem doprinijeli razvoju lokalne samouprave i poboljšali uvijete života i rada u društvenoj zajednici,
  - značajno doprinijeli u otklanjanju elementarnih i ekoloških nepogoda koje eventualno zadese društvenu zajednicu.

### 3. Zahvalnica Općine Hadžići

- a) Kolektivima i pojedincima koji su u prethodnoj godini:
- imali pravilan i korektan odnos prema građanima u ostvarivanju njihovih prava,
  - doprinijeli poboljšanju uvjeta života i rada u lokalnim zajednicama,
  - postigli inovatorski uspjeh na tehničkom i drugom unapređenju,
  - doprinijeli uspješnom razvoju lokalne samouprave,
  - postigli uspjeh u proizvodnji hrane.

4. Posebno počasno priznanje zaslužnim kolektivima i pojedincima koji nemaju sjedište odnosno boravište na području Općine Hadžići.

#### Član 9.

Odluku o donošenju općinskih priznanja donosi Općinsko vijeće.  
Odluka iz stava 1. ovog člana se objavljuje u Službenim novinama Kantona Sarajevo.

#### Član 10.

Stupanjem na snagu ovog Pravilnika prestaje da važi Pravilnik o kriterijima i mjerilima za dodjelu priznanja i nagrada Općine Hadžići broj: 01-05.5-437/02 od 06.02.2002. godine.

#### Član 11.

Ovaj Pravilnik stupa na snagu narednog dana od dana objavljivanja na oglasnoj ploči zgrade Općine Hadžići.

Broj: 01-05-5-8713/2010  
Hadžići: 28.10.2010 godine

PREDSJEDAVAJUĆI  
Općinskog vijeća Hadžići

Jazid Bajrić